

防

河

奏

議

防河奏議卷五

李太參奏爲山東巡撫督理南河運督事務摺稿

題署淮揚道員缺

題爲欽奉

上諭事該臣等看得淮揚道一缺管理黃運河湖

堤岸工程并分巡各屬地方事務吏治河防均關緊要必須才能敏幹人員方克勝任欽奉

諭旨江蘇布政使員缺着淮揚道白鍾山補授淮

揚道員缺着嵇曾筠尹繼善於屬員內揀選委
署俟秋汛後送部引見欽此欽遵臣等在於屬
員內詳加選擇惟有淮安府裏河同知夏建
德於上年秋月水勢漲發之際殫力修守用
心防護汛內工程得保平穩且於理事職任
更能整飭稽查旣嫻吏治復熟河防實係辦
事幹練才堪肆應之員所有淮揚道印務臣
等遵

旨請將夏建德暫行委署現今桃汛甫過伏秋大

汛接踵而至令其督率廳汛加謹修防辦理
賑務彈壓地方俟於霜降後給咨送部引

見伏候

聖裁除將該員履歷實蹟另冊送部查核外臣謹
會同蘇州巡撫協理河工事務臣尹繼善合
詞具疏

題明伏乞

皇上睿鑒施行雍正九年三月二十七日

題奉

旨該部知道欽此

建築禹王臺竹絡石壩

題爲請

旨事雍正九年三月初五日准工部咨開都水清吏司案呈雍正九年二月十九日內閣交出江南河道總督嵇曾筠奏請修復郟城縣禹王臺竹絡石壩工一案奉

旨照所請行該部知道欽此欽遵抄出前來相應抄錄原奏行文江南總河并河東總河可也爲此合咨前去欽遵查照施行計粘單一紙

竊照東省郟邑禹王臺一工原以抵遏沫水
俾其東由江南沭陽海州入海不容其會合
蒙沂白馬諸山河之水入駱馬湖以爲運道
民生之患所關綦重自明季郟令拆移臺石
修砌城垣水遂西行爲患滋甚康熙二十八
年恭遇

聖祖仁皇帝南巡閱視中河前河臣王新命以中河
之水全資駱馬一湖而湖受沂沭白馬諸水
時常泛濫於是請修土石兩壩堵截沫水江

南數十年無上游水患者職此之故後經前
河臣陳鵬年於土壩之南越築圍堤一道前
河臣齊蘇勒又於臨河設立防風埽工更建
築鐵堤子堰以爲重障誠有見夫土石兩壩
維繫江南數百里之運道千萬戶之民生慎
之重之而年年修守者也不虞上年秋汛東
省山水異漲將禹王臺土石埽壩各工全行
冲塌僅存竹絡石壩二十七丈壩之南北殘
缺土堤二百餘丈沂沭諸水一時滙注於駱

馬湖盈堤溢岸莫可抵禦仰賴

聖王誠敬格

天水勢旋消漫溢各工得以尅期底績而東省郟邑
壩工實爲目今要務若上源一日不治則下
游一日不安雖禹王臺隸在北河應聽北河
河臣經理但此壩之興廢關係江南黃運兩
河之利害况南北原爲一體事機尤屬切膚
臣前已兩次咨商北河河臣業准咨覆檄飭
委員勘估第兩省文移往返稽遲且值新舊

河臣交代接替輾轉耽延竊恐會

題部覆爲時甚久急切不能竣事萬一山水驟發或致措手不及微臣愚昧身膺重任不得不鯁鯁過慮也伏念駱馬一湖乃衆水滙歸之地今又益以沫水并諸山積潦建瓴而下直注駱馬湖地尤逼近而勢更騰湧查禹王臺現係沂邾海贛同知所轄沂邾則屬北河海贛又屬南河南北交界均有責任現今臣等於請定廳員管轄等事案內會

題請聽南北河臣考察在案今臣酌量該工圉

堤防風等工目前尚屬可緩惟將最要壩工
乘此汎水未發之前卽令該廳會同郟城縣
於舊石工以上現存殘缺石工二十七丈之
處接築壩工共長九百餘丈誠恐上堤不堅
山水性猛難於捍禦應令通身建作竹絡石
壩俾水從壩過而壩不動搖沙至壩停而壩
復堅實愈資抵禦此壩一成沫水可以東分
駱馬湖不致盈溢縱有白馬沂河等處之水

亦可相機宣洩江南之運道民生庶保無虞
矣前項壩工土石分築但頂衝緊要之處必
須多用竹絡石壩并挑濬沐水舊河口門約
需銀三萬餘千兩統容臣親赴該工相度機
宜詳加核算再行確估但工程緊急竹石等
料備辦宜早其所需銀兩可否卽於南工河
庫內動支給發臣未敢擅便伏候

訓旨遵行

臣

現今江工查勘已畢復由邳宿一帶

前赴該工親身查勘所有禹王臺壩工急應

修復事宜合先恭摺請

旨伏祈

皇上睿鑒施行謹

奏等因到臣准此當卽檄行遵照確估去後今

據山東兗寧道副使王鴻勳淮徐道副使呂
維炳淮揚道僉事白鍾山會勘造冊詳送到

臣據此該臣等看得山東郟城縣境內禹王

臺一工原以抵遏沫水俾其東由江南沭陽
海州南行入海不容其會合蒙沂白馬諸山

河之水入駱馬湖以爲運道民生之患所關綦重因上年秋汛東省山水異漲將禹王壘土石埽壩各工全行冲塌僅存竹絡石壩二十七丈並壩之南北殘缺土堤二百餘丈難資抵禦是以臣於本年二月內將急應修築情形以及約需銀兩恭摺具

奏并聲明容臣親赴該工相度機宜再行確估其所需銀兩可否卽於江南河庫內動支給

發荷蒙我

皇朝通志 卷五
皇上念切運道民生

欽頒

俞旨照所請行該部知道欽此欽遵隨即轉行確估去後今據該道等會詳稱遵即帶同該管印河各官親勘確估查禹王臺應建竹絡石壩共長六百四十丈其接新石絡以北應創築土堤長三百丈壩南應補築漫缺土堤長四十八丈外坡包鑲石絡至所存舊堤石土壩工長三百八丈三尺內二十七丈係石絡

舊壩兩肩陡坦應以碎石一律壘砌補平又
十四丈外坡原係石絡鑲邊水冲石塊現存
應揀取修整又五十八丈三尺外坡原有雁
翅石絡挑水開行毋容加絡鑲邊其餘二百
九丈應於堤之外坡包鑲石絡以資捍禦再
將沫水進口轉灣歸故河道淺阻之處疏濬
深通以資暢流以上通共計新築石土壩工
長九百四十丈又補修舊石土壩工長三百
五十六丈三尺并開挑沫水進口河道一百

丈共估用工料土方銀三萬八千六百四十
三兩七錢零相應轉詳

題估再該工經前河臣王新命創建原案一切
夫工均係撥用徭夫不計錢糧今查徭夫一
項業經

題明歸入黃河廳曹單二汛每年加幫大堤力
作歲修工程萬難調撥且石絡工程較與從
前多至二十餘倍需夫甚多俱係據實確估
並無浮冒等情造冊詳送前來臣復親勘查

核無異除勅支江南河庫銀兩給發該廳縣
辦料興修俟工完之日會同河南山東河臣
查核

題銷并原冊送部查核外相應會同河南山東
河臣沈廷正河東督臣田文鏡山東撫臣岳
濬蘇州巡撫協理河工事務臣尹繼善合詞
具

題伏乞

皇上睿鑒勅部議覆施行雍正九年五月十五日

題奉

旨該部議奏欽此部議准行雍正九年八月初一

日奉

旨依議欽此

附紀

沐水由穆陵關而下會莒蒙諸山水合流東注抵馬陵山相傳大禹治水時鑿山口導水西流復建臺障之俾由東南入海自明季鄭令毀臺取石以繕郭水遂西流會合沂河白馬河諸水湧入駱馬湖湖不能容漫入黃運兩河沂邳邳宿諸州邑歲有淪胥之患且爲運道梗康熙二十八年

聖祖仁皇帝南巡狩詔河臣王新命治之爰建竹絡

石壩二十七丈以抵遏沐水復由東南故道
歷紅花埠峒晤沐陽海州歸海厥後河臣陳
鵬年接築土堰河臣齊蘇勒增修茨防區畫
備至雍正八年六月

曾筠

欽承

恩命調任南河甫及旬日卽遇山水驟發淫潦異
漲駱馬湖水盈堤溢岸越運浮黃勢莫可遏
因念駱馬湖雖爲諸水匯歸然非沂沐合流
其暴未必至此上源禹王臺土石工程必有
漂洶之虞隨赴該工查勘一望瀾漫盡成沙

渚臨河堤埽果蕩然無存惟舊時竹絡石壩
二十七丈巋然無恙循沐水而東卽係馬陵
山山後層巒疊嶂千谿萬壑勢若建瓴而沐
水進口處嶄然中劃形如斧劈其下深不可
測水勢自東徑西盡失其入海故道若不亟
思所以修治之則下游州邑罹水患者終無
底極而歲漕轉運亦復可虞但山水性猛頂
衝直激非土堤椿埽所能禦卽大發帑金如
高堰之甃石而地係浮沙基不堅實亦無所

施其功若夫水衝不損而又能隨沙坐實足資捍禦則惟竹絡石壩爲至計况山中多產碎石取材富而易因議從舊竹絡壩接築六百四十丈審地形以扼其要害蜿蜒綿亘自西北漸之東南又於新壩北首接築土堤三百丈枕山坡爲依據其舊壩之南殘缺土堤三百零八丈下迄民堰止築用竹絡石鑲邊一律修砌完整又於沫水進口之河頭挑去砂石俾舊河深通暢流計費三萬八千六百

四十兩有奇

聖天子軫念民瘼俯允所請不待下其事於部議
卽准江南河庫動支帑項隨分檄海贛同知
蔣祈年郟城知縣馮爲桐縣丞張杞承築飭
委原估官胡士圻等監工督催從事斯役者
咸知運道民生之重鳩工庀材踴躍奮興始
其事於雍正九年之二月至六月卽告竣是
年伏秋山水又大發壩工抵住不能西注仍
由沐河東南故道入海沂郟邳宿之民恃以

無恐黃運工程亦安流無恙則是工之興廢
關於江南利害較東省爲尤鉅司河者慎毋
隳厥成功也哉

開挑正人洲引河建築夾江大壩

題爲敬籌大江形勢請開分溜引河以固城垣
以利漕運仰祈

睿鑒事該臣等看得瓜洲大江西南正人洲潮沙

淤墊日益寬長數年以來洲尾長有翅膀定
業等洲挑激大溜直射瓜洲花園港一帶以

致歷年歲搶修工程旋修旋墊不能抵禦江
岸日漸塌卸逼近城垣危險堪虞經臣具摺

奏請將高資港河頭之浮沙暗灘力爲疏濬再

於正人洲開挑引河其翅膀等洲長出河嘴
老灘并油沙稀淤處所照例設立犁船二隻
并令舊設之救生船協力同施用混江龍等
器往來刷滌等因奉准部覆應如所請作速
動支銀兩給發募夫價挑仍將應挑河道工
段寬深丈尺并設立犁船動用銀兩欸項數
目一面動工一面題估造冊報部查核其花
園港等處應令該督詳細斟酌量爲修護以
資防禦等因奉

旨依議欽遵轉行確估在案今據署淮揚道夏建
德冊詳前來臣查瓜洲大江南灘上源有高
資港一道形似夾江而河頭不暢應將高資
港之浮沙并正人洲迤上舊有港汊之處力
爲疏通以暢其流又於正人洲下截頂衝迎
溜舊有河形之處挑挖引河一道長四百三
十丈引水南行以分江溜接此河之尾又生
開引河一道長二百一十一丈使上源之水
滙流直注夾江減其北趨之勢庶瓜洲一帶

城池運道得以保護又恐引河之水從夾江
仍向東北逼溜直注瓜洲今相度形勢應於
夾江內築夾土壩一座長一百五十丈五尺
兩面下埽鑲墊發釘大椿於夾壩中間填土
以攔水勢又恐伏秋大汛漫灘水高數尺復
於壩上壓土高七尺兩頭接築土壩二百五
十八丈以防夾江之水漫灘四散又於定業
洲迤下挑濬支河一道長三百六丈俾引河
大溜順流從支河宣洩直抵南岸大江至於

高資港河頭江心套港口以及正人洲翅膀
洲長出磯嘴挑溜之處督率河兵開夫乘駕
犁船用鐵籠混江籠等具併力挑切犁爬務
俾疏通暢流分引江溜保護瓜城以上挑河
築壩造船共估用土方工料銀四萬九千七
百七十七兩七錢八分零相應

題估發帑興挑工成之日請照康熙五十五年
間

奏明事案內創建江工之例入於歲搶修案內

修理至於瓜洲花園港一帶迎溜之處相機
下石護崖鑲埽以衛城社因係緊要工程除
動支河庫存貯各欸銀兩給發該廳等償辦
料物將引河分段挑挖夾壩併力堵築完竣
相機開放并將原冊送部查核外臣謹會同
江南總督臣高其倬總漕臣性桂河南山東
河臣沈廷正蘇州巡撫協理河工事務臣尹
繼善會詞具疏

題估伏乞

皇上睿鑒勅部議覆施行雍正九年五月二十四日

題奉

旨該部速議具奏欽此部議准行雍正九年六月二十四日奉

旨依議速行欽此

附紀

瓜洲濱大江北岸其城與南岸京口相爲犄角控扼江海乃沿江之要地漕運之咽喉也因江之西南有正人洲迴溜沙淤日漸增長挑溜北注直薄瓜城洄漩汕刷崖岍塌卸於康熙五十五年建築埽壩添設歲搶修工程用資抵御然江流猛烈激湍震撼埽工隨下隨蟄大江逼近城隍危險堪虞曾筠數往查勘乘舟徧視知受患雖在瓜洲而致患之由

則在上游沙渚若不分其北注之勢導其南趨之路則金山以上之旋溜積沙正人洲以下之翹勝定業等洲挑溜愈急兼之中有大江南有夾江兩水并衝瓜城勢不能支此時欲以長椿大埭敵千尋之巨浪以保護洲城憂憂乎其難哉昔人有言曰以水治水以水攻沙實探本窮源之論今亦惟以水治之而已乃於上游對岸之高資港則設船疏擴以分其勢於正人洲則挑濬引河順注夾江以

暢其流又恐夾江之水仍逼東北則於夾江尾閘搶築大壩一道以遏其衝俾浩瀚江流奔赴於五公灘引河旋繞於南岸山根以直達大江而北岸瓜城之勢減矣至于翅勝等洲老灘則挑切之新淤則梳爬之皆所以平上游之患也夫而後審察瓜洲沿江崖岸於迴溜則下搜崖埽以護之於頂衝則下沉水埽以禦之而其間之或用挑水或用磯嘴悉因地相機以資防護獨是大江之水與黃河

不同黃水挾沙而來遇埽卽停沙停則塔
固大江水清性烈潮汐晝夜不停凡遇埽工
不能汕擊于上卽往埽根淘刷久之埽底淘
虛工程下墊而崖岸之坍塌隨之是以黃河
埽工在在可恃而施之江工則又有未可全
恃者曾筠籌畫再四終無善全之計因思古
人治水之法除疏濬椿埽而外兼用土石然
竹絡旣虞費帑又恐兜水今變化其用石之
方凡於埽根汕刷之處多下石塊以護之庶

水力不能淘刷埽個得以穩固審度既定遂親臨工所命廳營汛弁卽挨埽下石試之豈知石下之處汕刷之勢果減埽工依然無慮遂繕摺

奏請仰蒙

皇上俞允于是疏築並舉椿埽兼施而且設犁船以梳爬沙嘴下碎石以防護埽根數年來瓜之城社民生俱得保全無恙當是時議論紛如謂碎石護崖之法前人未用且夾江大壩

孤立江心勢不能存不知苟能熟察乎水之
形勢詳審乎水之性情卽古人未用之法而
變通用之亦未始無濟者豈必拘拘刻舟以
求劍耶惟我

皇上聖明洞燭機宜出以

乾斷

巽命風行俾瓜洲數萬民生盡免陪危而登衽席
恩膏普被浩蕩難名是又紀述之所不能盡者矣

留工効力人員

題爲循例

題明効力人員以資河防事竊惟修守機宜得人爲重江南地卑工險河務殷繁一應差委需員甚多臣荷蒙

聖恩調任南河蒞任之始卽經查明通工効力人員自前河臣及署河臣尹繼善各任內

題明留工共計百有餘員以供驅使惟是歷經兩載更番差遣除委署叅革丁憂事故之外

爲數漸少目今高堰石工押催僱砌瓜洲江
工挑挖引河修復駱馬湖上游禹王臺壩工
挑挖駱馬湖以下六塘河河道以及協辦黃
運兩河各汛緊要工程同時具舉在在需員
委用加以三汛防險各廳查料催漕報水一
切工務分派調遣之處甚多所有從前

題留之員實屬不敷臣查前河臣陳鵬年齊蘇

勒孔毓珣署河臣尹繼善各任內尙有久經
收錄留工効力未及

題明并臣因上年汛險乏人新經收錄各員皆於水勢長發之際同在工所効力行走其中有不避危險協同搶救工程者有派防險汛加謹保護平穩者有委辦委催緊急工料尅期償運接濟者俱竭蹙辦公殊爲出力伏念上年秋汛有功人員仰荷

皇恩議敘等將現任各員并及已經

題留人員分晰等次造冊咨部而此等人員因未經

題明不便一例造入冊內均沾

曠典但旣在工趨事實難泯其勞績今臣於各員
內擇其年力精壯勤敏小心取到殷實印結
者選有候選州同楊惠春等四十一員又有
未經取到印給同在上年搶護險工勞效昭
著及現今委辦要工勤謹出力者候選州同
于廷烈等七員據該道廳等保詳請循例留
工効力臣復歷經差委試看才具皆有可用
一併附入疏內通共計有四十八員仰懇

皇上天恩俯念河務需員准其一體留工以敷差
委以示鼓勵則各員自必益加感奮努力而
臣等亦得收臂指之使自留工以後倘有敗
檢踰閑等不時察訪叅處再此內有江南
籍貫者例應迴避但查歷次投効人員惟江
南最多他省及旗員不過十之二三若悉令
迴避本省人才愈難况江南人員生長河干
素悉堤工河道今該員等差遣已久伏願
聖恩請照前署河臣尹繼善

題留江南籍貫効力知縣陳儒等十六員之例
仍留南工俟有勞績以專管河務之缺補用
或咨北河酌量

題補除循例開列各員職名履歷功績造冊送
部外臣謹會同蘇州巡撫協理河工事務臣
尹繼善合詞具

題伏乞

皇上睿鑒勅部議覆施行雍正九年六月十三日
題奉

旨該部議奏欽此部議覆准雍正九年十月二十

二日奉

旨依議欽此

設立堡房堡夫

題爲循例

請設堡房堡夫以助修守以固隄防事竊照河工要務全在堅築隄防尤貴專人修守有堤而無人則與無堤同有人而不能使其常川在堤盡修防之力則又與無人同此豫省所以有堡房堡夫之設南河亟應循例

請行者也查江南黃運兩河堤岸縱橫綿亘二千三百餘里險工林立要汛繁多比年以來

荷蒙

皇上發帑興修凡屬卑矮之處靡不增培高厚每歲應行修理事宜亦莫不仰邀

睿鑒先事預防雍正七年復荷

聖明念及河兵只供搶險未能概令修防着將黃運堤工遞年加高五寸仰見

皇上弘謨遠畧超越千古爲隄防計者至周且密矣所有修守事宜臣等敢不旱夜講求務期鉅細靡遺以仰荅

聖主慎重河防之至意竊見江南十河營兵丁雖
係沿河設立有修防之責然下埽簽椿是其
專司南工埽壩繁多一處搶險各處調撥若
遇汎水長發恒苦分身無術誠如

聖諭河兵只供搶險未能槩令修防也况長堤原
無堡房做工夫役每逢大雨遍體淋漓既無
容身之所又乏炊爨之處風餐露宿亦難責
其晝夜不離伏查豫省河兵之外設有堡房
堡夫使河兵聚集於埽壩堡夫殫力於修防

業已著有成效今江南事同一例仰懇

皇上俯准照豫省每二里蓋一堡房每堡一座設
夫二名歸於該管文武汛員管轄令其駐宿
堡內常川巡守無事則搜巡獾洞鼠穴修補
水溝浪窩每日堆積土牛可多得土方之用
設遇有警則鳴鑼爲號上下兵夫齊集協力
搶護如此則江南黃運堤工汛堡沿排聲援
互倚修守綦嚴而隄防實資鞏固矣今查各
廳黃運兩河堤工蓋造堡房共需一千一百

五十四間每間估銀三兩共需銀三千四百六十二兩堡夫共需二千三百零八名每名每月工食需銀五錢以一年總計共需銀一萬三千八百四十八兩如蒙

俞允

請將堡房銀兩動撥藩庫存留欸項給發各州縣會同廳員就近於堤上預爲建設其每年工食俟各該州縣招募堡夫到日統於藩庫按季撥發州縣貯庫於每月會同廳員唱名

給散庶幾印河各官互有覺察而錢糧不致
有那移扣剋等弊除現在另造細冊送部查
核外臣謹會同蘇州巡撫協理河工事務臣
尹繼善合詞具

題伏乞

皇上睿鑒勅部議覆施行雍正九年八月初三日
題奉

旨該部議奏欽此部議准行雍正九年十月二十
日奉

旨依議欽此

預撥鹽課銀兩

題爲

題明事竊照江南黃運湖河一切埽壩工程每年需料繁多必須乘時購辦預爲堆貯方堪濟緩急而資修守臣於上年水長之時親見臨時辦料挽運維艱無補急需是以循照豫省之例

題請在於年前九十月內約計購辦十分之七限以十一月內運工一半次年正月內全運

到工其餘視工程緩急再行辦運荷蒙

聖明俞允接准部覆遵行在案第查河庫錢糧俱

係按年撥解今既於年前九月內預爲購

辦來年料物則來年應用錢糧亦須於年前

九十月內預爲撥解河庫始足以供支給之

用查河庫錢糧除別項難以預撥者無庸置

議外所有雍正五年間經前河臣齊蘇勒

題請每年撥解河工鹽課銀三十萬兩原爲辦

料修防之用但此項銀兩歷年俱於歲底及

次年正月內始行解交河庫不克有副預備之期伏思各工料物既定於每年九十月內預爲購辦則前項鹽課錢糧亦須於每年九十月內早爲撥解庶得給發無悞仰懇

皇上天恩俯念修守機宜工料綦重

請將每年撥解河工鹽課銀三十萬兩內先撥解銀一十五萬兩預於每年九十月內解交河庫其餘銀一十五萬兩仍循向例於該年正月內撥解以便督令河庫道給發各廳僭

辦料物如限貯工照例責成該管道員嚴催
運工詳委就近州縣盤查出結備案一轉移
間則錢糧毫無增加而料物早得預備實於
河工大有裨益除移咨兩淮鹽臣將應撥確
正壬子年鹽課銀三十萬兩內先行撥解銀
一十五萬兩以資給發預備料物外臣謹會
同署江南總督卬務蘇州巡撫協理河工事
務臣尹繼善合詞具疏

題明伏乞

皇上睿鑒施行雍正九年九月三十日

題奉

旨該部議奏欽此部議准行雍正九年十二月十

九日奉

旨依議欽此

黃運兩河善後堤工

題爲遵

旨查議事雍正九年三月十五日准工部咨開都
水清吏司案呈大學士等奏覆江南河道總
督嵇曾筠奏請修築黃運兩河堤岸工程一
案雍正九年二月二十六日奉

旨依議欽此欽遵於本月二十七日內閣交出到
部相應抄錄原奏行文江南總河并劄行兩
淮鹽院欽遵

旨內事理遵行可也爲此合咨前去欽遵施行計
粘單一紙內開大學士等謹

奏爲遵

旨查議事據總督江南河道嵇曾筠奏稱竊照江
南黃運兩河道里綿長工程繁劇臣於上年

甫到江南境內見江南堤工迥與豫省不同
一則地勢本卑再則衆流畢集水勢益高堤
工愈險查江南黃河上自虞城單縣交界起
下迄安東海口止兩岸工程共有二十四萬

一千七百三十餘丈運河上白臺莊交界起
下至瓜洲江口止兩岸臨河縷堤工程共有
一十九萬二千一百三十餘丈兩河通共計
有四十三萬三千八百六十餘丈從前修理
兩河大堤并月格等堤共止修過十五萬四
千一百八十餘丈實不過十分之三四臣上
年初任寓目驚心正思逐一經理上請

訓旨未及奏陳不虞遽逢秋漲水勢盈溢荷蒙

皇上軫念河防民瘼

諭旨諄諄旣

勅加謹保護復

諭善後事宜是以各處漫工仰賴

聖謨堵築久經告竣殘堤業已修補臣凜遵

訓諭復又鑒此前車敢不殫思補救以圖善後以

期鞏固又竊念徐邳以下各州縣瀕河被水

小民荷蒙

聖主賑恤兼施不致流離失所但當此麥未成熟
之候覓食維艱合無再懇

皇仁以工寓賑令其就食亦可資生再本案工程應令濱河印官與河官共同修理庶牧民之吏倍切民瘼管工之員益勵河防互相覺察協同辦理責成又易爲力臣一面檄飭淮徐淮揚二道將現今黃運兩河工程逐一查勘據實確估會核題請如蒙

俞允請照例先撥鹽課銀二十萬兩乘此青黃不接之際給發買土募夫尅日起工等語查黃河堤岸所關甚鉅而運河之堤上年經東省

山水漲漫之後亦當急爲修築况值此青黃不接之時動興大工俾沿河數十萬之民就工謀食亦補助賑濟之一法應令署兩淮鹽政伊拉齊將雍正八年鹽課銀二十萬兩作速解送總河衙門令總河嵇曾筠將黃河堤工險要之處先行買土募夫尅日起工其運河殘缺之處卽行修補餘亦次第修築務期堅固幫厚以抵異漲將各處之工程交與濱河印官會同河員分段管理互相稽察以專

責成仍令稽會筠將應修工程據實確估核
題可也爲此謹

奏請

旨等因到臣准此該臣等看得江南黃運兩河堤
工經上年秋水盈溢之後荷蒙我

皇上指授方畧

諭以修守善後事宜臣謹遵

諭旨

奏請興修以期鞏固並懇

皇仁以工寓賑令瀕河被水小民得以就食准部

議覆應令兩淮鹽政伊拉齊將雍正八年鹽

課銀二十萬兩作速解送臣衙門令臣將黃

河堤工險要之處先行買土募夫尅日起工

其運河殘缺之處亦次第修築務期堅固耐

厚以抵異漲將各處工程交與濱河印官會

同河員分段管理互相稽察以專責成仍令

臣將應修工程據實確估核題等因奉

旨依議欽此欽遵當卽飛檄印河各官卽日領帑

募夫分段買土僱修一面嚴飭淮徐淮揚兩道逐一確估造冊去後今據淮徐道副使呂維炳署淮揚道印務夏建德詳據各廳估修黃運兩河善後堤工挑挖河道并護堤板工等項共估用土方料物銀二十萬三千五百二十五兩四錢六分零各造清冊詳送前來臣等親勘復核無異因係緊要之工照例先行動支原撥解鹽課銀二十萬兩外又動支河庫存庫銀三千五百十五兩四錢六分零

給發濱河印官與各河員分段照估僱修除
將原冊送部查核外相應會同河南山東河
臣沈廷正署江南總督印務蘇州巡撫協理
河工事務臣尹繼善恭疏具

題伏乞

皇上睿鑒勅部議覆施行雍正九年十月初七日

題奉

旨該部議奏欽此部議准行雍正九年十二月十

七日奉

昔依議欽此

附紀

雍正八年秋邳宿河湖異漲

皇上履念民瘼蠲賑頻施

大沛洪仁如天如地

曾筠

於堵築工次督令河員

募夫力作每聞在工夫衆羣相告語今歲偶
逢水患仰沐

皇恩蠲免錢糧復又遍戶查明賑濟我儕無以仰
報迺區區擔土負薪之勞顧又日給以值不
但一已果腹闔家老幼俱得免於饑餒用是

歡欣踴躍爭先趨事加高培厚克有成功夫
寓賑於工原屬救荒之策况南北兩岸堤工
歲久剝蝕更遭異漲益多殘損增修尤不容
緩今以水衡必需之帑爲補助災黎之用一
舉兼善澤弘利溥皆由

聖主俯允奏請始得飛檄印河各員分投買土興
工二十萬兩之帑金全活者豈止億萬戶計
自八年之十一月始至九年四月迄工積半
歲之久濱河兆姓老幼男女無不攜筐荷鍤

盡一手一足之力爲仰事俯畜之資出於阡
危登之衽席而兩岸隄防已屹若金湯矣會
筠於工完勘丈時目睹夫二麥盈疇閭閻安
堵如故向之鳩形鵠面者盡易爲含哺鼓腹
相忘於荒歉之餘然後知

皇恩浩蕩變霜雪爲陽和直指顧間事恭逢

堯舜在上雖有灾眚不能爲患洵億兆臣民之幸
也夫

淮徐道員移駐宿遷

題爲請

旨事竊照江南淮徐道一缺管理黃運湖河堤岸
工程并分巡徐邳二州兼轄桃源縣及徐州
潼安二衛地方事務吏治河防均關重大必
須駐劄適中緊要之地上下巡查殫力策應
方無貽悞查該道從前兼管河庫錢糧駐劄
清江於雍正七年經前河臣孔毓珣以該道
有工程地方事務不能兼管河庫

奏請仍循舊例分任職掌荷蒙

聖恩俞允頒到

勅書令其駐劄徐州欽遵在案惟是徐州雖爲江
南河道上游但與宿桃一帶緊要工程之處
相隔寫遠文移往返動經數日汎水長發之
時不能一呼卽應今臣查宿遷縣地方界於
黃運兩河之間爲淮徐所屬南北適中之地
且駱馬湖切近宿城上接蒙陰沂泗諸山之
水併流滙聚一帶堤岸險汎最多上年湖水

漲發幸賴

皇上至誠感格

洪恩浩蕩旋即保護平穩本年伏秋二汛臣前往
宿遷督率文武各員搶修工程細察駱馬湖
水勢已有禹王臺新築壩工攔截沫水分路
入海但蒙沂諸山以及荆山口微山湖等處
之水滙流而下勢亦浩瀚似宜將淮徐道員
移駐宿遷庶得朝夕相機料理時刻加謹修
守較之駐劄徐州大爲有益至於分巡地方

事務該道衙門既駐適中之地則上下查察更覺便易而文書往返亦得迅速辦理不致稽延遲悞再查該道徐州舊署久已坍塌現在估修如蒙

聖恩准其移駐宿遷請卽以徐州估修之費在於宿遷縣地方創建一轉移間吏治河防均有攸賴矣臣謹會同署江南總督卽務蘇州巡撫協理河工事務臣尹繼善合詞具

題請

旨伏乞

皇上睿鑒勅部議覆施行雍正九年十一月十四

日

題奉

旨該部議奏欽此部議准行雍正十年二月二十

六日奉

旨依議欽此

添設標營將弁整飭營制事宜

題爲欽奉

上諭事雍正九年十二月初五日准戶部咨開雍正九年十一月十六日內閣交出大學士張廷玉等奏前事內開雍正九年十一月初六日大學士張廷玉蔣廷錫內大臣戶部侍郎海望都統管理藩院事務莽鵠立奉

上諭山東登州乃濱海重鎮所轄地方遼濶查該鎮本標及所屬兵丁除水師外額兵六千餘名

似不敷用再自添設河東總河之後將南河總
河標兵歸於河東總河管轄而以漕標兵丁一
千餘名改歸南河總督於是兩河標兵及漕標
操防之兵俱覺不敷此四處兵丁應否酌量增
添之處爾等詳查定議具奏欽此臣等查得登
州一鎮所轄汎地跨濟登青萊四府南北東
三而臨海延遠二千餘里洵屬海疆重鎮而
所屬文登等十營兵丁祇五千餘名汎廣兵
單且本鎮標兵除水師外馬步兵僅一千三

百餘名又有貼防分汛之用在城之兵僅數百名實屬不敷臣等酌議應添兵一千名駐劄鎮城以實行伍再總河標下原於濟寧州設立馬步兵一千九百六十八名分防河汛嗣於雍正七年添設總河一員分任南北河道遂將濟寧之河標兵一千九百二十一名俱隸河東總河管轄而以漕標之徐州宿遷城守三營兵一千七百五名并抽撥葦蕩兩營濟寧河標兵各四十七名改隸江南總河

查北河統攝河南山東兩省前項標兵祇可
分防河汛其在城守者僅濟寧衛一營實屬
不敷南河標兵祇一千八百餘名於內派出
一千六百名分防徐州宿遷等處河汛江南
總河駐劄之清江浦僅有兵丁二百餘名甚
覺單少再漕標舊有兵六千餘名已將徐州
等三營撥屬總河本標祇存兵四千五百名
各有催漕饋運之差使存駐淮安者寥寥無
幾臣等酌議請將漕標及兩河標兵各添設

一千名與添設登鎮陸路之兵共四千名交與總漕總河并登鎮總兵官精選技勇壯健之人照馬四步六之例召募充補毋得潦草狗庇將老弱無能者應數濫充倘有此等情弊查出時將召募之員交部嚴加議處此項兵丁入伍之後遴選員弁勤加訓練務使技藝精熟行伍整齊至一應馬匹盔甲軍器各項務製備齊全一有調撥數日之內即可起程倘平時怠於訓練及軍裝等項不能齊全

將管轄之員交部議處再查登鎮水師原額
兵一千二百名起繪船二十隻康熙五十二
年將水師兵丁裁歸陸路其識水性海路者
移於奉天金州并將起繪船十隻一并發往
金州登鎮只留水師兵五百名起繪船十隻
後經總督用文鏡條奏添設船七隻兵三
百五十名共兵八百五十名但所轄海面島
嶼甚多往來巡哨之用尙覺不敷似應再添
船三隻兵一百五十名以足一千之數此

所添兵丁務選擇熟於海道及通曉水戰之人召募充補其船船一項行令山東巡撫委員監造至各處添設兵丁其應加守千等員及應建營房令總漕江南河東兩處總河登鎮會同該督撫詳酌妥議具題其應需糧餉等項令各該督撫照例支給入於兵馬奏銷冊內造報可也爲此謹

奏請

古雍正九年十一月十五日奉

旨依議欽此交出到部爲此合咨前去欽遵施行
等因到臣准此該臣等會看得江南河標中
右蕭三營共兵一千八百八十九名內除分
防徐邳豐沛蕭揚山睢寧宿遷桃源九州縣
汎地兵一千六百九十一名外其近臣駐劄
之清江清河二汎兵丁止有一百九十八名
分防操演誠屬寥寥我

皇上睿慮周詳

特諭廷臣應否酌量增添經大學士臣張廷玉等

議添兵一千名令臣精選技勇壯健之人充
補遴選員弁勤加訓練務使技藝精熟行伍
整齊至一應馬匹盔甲軍器各項務製備齊
全其應加守千等員及應建營房令臣等會
同詳酌妥議具

題臣等遵卽增添兵丁充實營伍以敷操防但
江南河標原係漕標改撥營制尙未詳備今
召募之兵旣多卽應添設管轄官員專司約
束伏查中營副將一員現領守備二員千總

二員把總四員兵七百四十九名兼轄蕭營
守備一員把總一員兵二百五十一名巡防
徐州豐沛蕭碭山睢寧等六州縣汎地環圍
一千五百餘里右營遊擊一員現領守備二
員千總二員把總五員兵八百八十九名巡
防邳州宿遷桃源清河山陽等五州縣汎地
環圍亦有一千五百餘里該副將遊擊之職
司固繁且鉅矣若再將所添之兵一千名俱
屬該副將遊擊管轄誠恐約束難周今相度

機宜應另設一營分轄新兵六百名駐劄清江浦隨標操演第非守千等員足以彈壓且查中營副將駐劄徐州城內離清江浦五百餘里右營遊擊駐劄白洋河鎮離清江浦亦有一百五十餘里相隔寫遠策應維艱今應於清江浦添設副將一員以爲河標中軍官聽候調度統轄清江新舊弁兵護衛清江衝繁重鎮專司操演勤加訓練庶管轄近而約束自嚴約束嚴而訓練自精於新添兵丁大

有裨益至清江原設守備一員照例改爲都司以爲副將中軍官聽候提調新兵六百名照依營制每兵二隊計兵一百名應加管轄官一員今應加千總二員分爲左右哨把總四員分爲左哨二員右哨二員左右哨內又各分爲頭二司分領兵丁協力操演屬副將統轄都司兼管以爲河標中營其右營原防清河汛把總一員并清江清河兵一百九十八名統歸中營管轄原漕標徐州營改爲河

標中營者今應改爲河標左營合之右營統
成三軍則河標營制從此整飭再查左營副
將雖現領兵一千名右營遊擊除管轄清江
清河二汛舊兵一百九十八名歸中營管轄
外雖仍領兵丁六百九十一名但除分防汛
地之外其實副將駐劄徐州城內止有兵三
百二十二名遊擊駐劄白洋河鎮內止有兵
二百六十名俱覺單少今應將新兵分二百
名駐劄徐州城內隨副將操演查徐州協標

守備千把除分防外隨標止有守備一員今
應加千總一員把總一員專司操演如是則
徐州重地營伍亦得以整齊再將新兵分三
百名駐劄白洋河鎮隨遊擊操演查該遊擊
所轄守備千把除分防外防營止有千總一
員今應加千總一員把總一員專司操演如
是則白洋河重鎮營伍亦得以整齊統計河
標添設副將一員千總四員把總六員守備
改爲都司一員均有訓練兵丁之責必須才

堪勝任者方可補用其副將都司等員如蒙
俞允伏乞

皇上天恩准臣等就近在於江省各標營內詳加
考察調補千把總一體挑選調用分別咨

題請

首庶得人地相宜於營伍有濟第清江雖設立副
將以資管轄而新募兵丁臣等仍督率訓練
務期兵丁技勇嫻熟以實營伍再查營房一
項每兵一名應給與二間馬兵每名應另給

與馬棚一間各照依駐劄處所按名建蓋至
添設官員亦應各給與衙署一所得以棲止
再清江原屬漕標分防汛地未有演習兵丁
教場今既添設中營官兵六百七員名合原
防清江清河二汛官兵二百一員名共官兵
八百八員名應設教場一處以便率領新舊
兵丁勤加訓練以備調遣除召募兵丁臣等
凜遵細加挑選業已遵照馬二步八戰守各
半充補齊全現在勤加訓練務使技藝精熟

行伍整齊馬匹亦已購足盛甲軍器官署營房教場等項俱現在確估另行會核具

題外相應會同署江南總督印務蘇州巡撫協理河工事務臣尹繼善署蘄州巡撫臣喬世臣恭疏具

題伏乞

皇上睿鑒勅部議覆施行雍正十年三月十八日
題奉

旨原議之大臣等議奏欽此議覆准行雍正十年

五月初七日奉

旨依議欽此

遵例自陳

奏爲遵例自陳事竊臣係江南蘇州府長洲縣人現年六十三歲山康熙丙戌科進士選翰林院庶吉士於康熙四十八年考授翰林院編修康熙五十二年癸巳科充會試同考官康熙五十六年充日講官起居注本年八月提督山西學政康熙六十年陞授詹事府左春坊左中允又陞授翰林院侍講雍正元年正月奉

旨入值南書房本年二月奉

旨補授都察院左僉都御史

特命署理河南巡撫事務隨奉

旨典試河南本年六月欽蒙

特恩陞授兵部左侍郎奉

旨差往河南堵築中牟縣十里店漫工十一月內

合龍斷流雍正二年二月蒙

聖恩念切豫省黃河堤工關係重大畀臣副總河

之職本年十月十三日准工部咨爲恭報秋

汎水勢情形等事一本奉

旨加三級雍正四年遵例自陳不職蒙

皇上格外優容着臣照舊供職雍正五年正月又

蒙

聖恩念切東省河務甚屬緊要

特諭廷臣議奏將黃河東省堤岸等工交臣管轄

本年三月准吏部等部咨爲請

旨事內開准禮部咨稱恭奏

聖世河清普天同慶一摺奉

旨加一級本年閏三月奉

旨補授吏部右侍郎本年十月准吏部咨爲恭報
秋汛水勢情形等事一本奉

旨加一級雍正六年正月奉

旨轉補吏部左侍郎本年三月奉

旨補授兵部尚書仍着辦理河工事務本年五月

奉

旨補授吏部尚書仍辦理副總河事雍正七年三

月欽蒙

特旨授臣總督河南山東河道提督軍務雍正七

年自陳不職蒙

皇上恩綸特沛着臣照舊供職本年十一月准吏部咨爲秋汛已竣等事案內奉

旨加一級雍正八年四月欽奉

上諭署理南河總督印務本年五月欽蒙

聖恩着以吏部尙書管理南河總督印務本年十一月二十四日准吏部咨爲恭報秋汛等事

案內奉

旨加一級雍正九年十一月十四日准吏部咨爲
恭報八月水勢等事一本奉

旨河道總督嵇曾筠初任北河時尙覺拘謹後因
歷練多年識見開展竭其心力與田文鏡和衷
共事凡所辦理皆甚妥協自總理南河以來公
正明達經理合宜不負朕倚任之重甚屬可嘉
著交部議敘具奏欽此應照例將嵇曾筠准其
加一級等因雍正九年十月二十六日奉

旨嵇曾筠著加一級欽此伏念臣才本庸愚識尤

淺陋荷蒙

皇上知遇隆恩屢膺拔擢洊歷卿尹之班
簡畀宣防之任十載以來無一時不叨沐
生成無一事不仰承

訓示惟茲江南河務坐當黃運下游爲滙歸入海
之區最稱險要邇年長堤鞏固二瀆安瀾皆
蒙我

皇上敬誠感召指授精詳俾得遵循恪守臣實知
識愚蒙寸長未効仔肩重大悚惕難安茲當

澄敘官方之際正宜菲材引退之時在大馬
戀

主之心葵忱時切而駑駘報効之力蚊負堪虞何
敢虛糜廩祿戀職自容伏乞

皇上將臣卽賜罷斥另簡賢能庶河防要務獲有
裨益矣臣不勝惶悚待

命之至爲此具本謹

奏請

青雍正十年四月十六日

奏奉

旨卿老成練達廉慎和不簡畀銓衡總督河道正
資料理着照舊供職該部院知道欽此

添設河庫道俸工

題爲欽奉

上諭事雍正九年八月十九日准吏部咨開雍正九年八月初三日內閣奉

上諭據總河嵇曾筠巡撫尹繼善奏稱揚州府知府張師載克勝河庫道之任着照所請將張師載補授河庫道揚州府知府員缺甚屬緊要着湖廣總督邁柱等於通省所屬知府內揀選一員調補其所有知府員缺着將永順府同知趙

侗敦補授永順同知等缺亦着該督撫遞行題

補欽此爲此合咨前去欽遵查照施行等因到

臣准此該_臣等看得河庫道印務向係淮徐

道兼管其官役俸工未經另爲添設今淮徐

河庫二道旣經分任管理所有河庫道官俸

役食必須另行編給查現任河庫道張師載

係知府陞授道員應照副使職銜編給俸銀

一百五兩嗣後如奉除授道員係僉事職銜

卽照銜支給餘銀扣存河庫至河庫道衙門

各役照經制設立典史二名快手十二名門
役四名皂隸十二名轎傘扇夫七名舖兵二
名與淮徐道衙門相同應照數編給又查該
道衙署設立清江浦五方雜處非有城郭可
比應設立庫丁八名以資防護以上各役除
典史二名例無工食外其快手等役共四十
五名每名歲支工食銀六兩共銀二百七十
兩通共官役每年共支俸工銀三百七十五
兩統於該道河庫河銀內按年支給役食以

庫道分設之日爲始官俸以該道到任之日
爲始在於歲報冊內銷算再該道專司庫務
有出納錢糧之責理合一併

請給傳

勅一道以專責守茲據蘇州布政使白鍾山詳請
具

題前來除將送到原冊揭送吏部工部查核外

臣謹會同署江南總督印務蘇州巡撫協理

河工事務臣尹繼善合詞具

題伏乞

皇上睿鑒勅部議覆頒給施行雍正十年五月二

十九日

題奉

旨該部議奏欽此部議准行雍正十年九月初六

日奉

旨依議欽此

建築四套月堤

題爲亟請建築月堤收束水勢以資捍禦事該
臣等看得阜寧縣黃河北岸四套五套一帶
地方坐當黃河尾閘諸水滙歸入海之區地
形最窪危險堪虞前於雍正八年秋汛水勢
驟長人力難於保護致將四套埽工衝塌經

臣

題請着落承修之員照例分賠在案今因南岸
長出沙灘溜勢日漸北徙四套上下甚屬危

險若再搶築埽工則臨河地勢虛鬆不特難於保護且錢糧需費浩繁臣親赴該工逐細確勘必須寬築隄防以禦汎水於三套以下高阜之處建築月堤一道庶上下包護兜灣俾水勢循軌東注不致有出漕旁洩之患查三套以下接連新善後工尾起至五套止建築月堤一道長一千八百丈估用土方銀九千一百一十六兩六分茲據該道確估造冊詳請核

題前來臣等復核無異因係緊要工程照例動
支部撥鹽課銀兩給發該廳募夫修築並行
署淮揚道印務夏建德監工督催及原冊送
部查核外相應會同河東河臣朱藻署江南
總督印務蘇州巡撫協理河工事務臣尹繼
善合詞恭疏

題估伏乞

皇上睿鑒勅部議覆施行雍正十年五月二十九

日

題奉

旨該部議奏欽此部議准行雍正十年七月初六

日奉

旨依議欽此

挑濬鹽河

題爲亟請築壩挑河以濟鹽柴運行以裨河道
事該臣等看得桃清中河廳屬清河縣楊家
莊鹽河間迤下舊有鹽河一道原以分洩中
河異漲之水濟運鹽柴船隻前因河身淤墊
中河水勢不能暢洩鹽柴船隻運行阻滯經
臣等

題估築壩挑河統計共銀三萬八千二百九十
二兩四分七釐五毫援照康熙四十年舊例

移咨鹽臣先動運庫錢糧令商人挑浚分爲五年捐還歸欵接准部覆應如所題業蒙

俞允欽遵在案祇因

題估之後卽值汎水驟長准前任鹽臣伊拉齊來咨據衆商稟稱請俟水退之後再行挑濬臣恐有悞鹽柴運行隨經飭令該管道廳將

鹽河開越河頭備料募夫僱築壩工收束水勢褻護堤頭并將越河口門設法挑撈引清水由鹽河下注以濟鹽柴運行今水勢已經

消落急應挑濬一律深通俾中河異漲之水
得以暢洩但鹽河現在寬深丈尺較比原估
之時汕刷不同若照原估恐滋糜費臣復委
員會同廳汛逐細確估應挑處所去後今據
署淮揚道印務夏建德詳稱查丈自鹽河開
越河頭壩起至舊河形止開挑河長四百五
十八丈又自鹽河開起至山安交界小朱元
莊止疏濬河長七千一十七丈又自小朱元
莊起至新安鎮止疏濬河長二萬二千二百

丈以上共應挑濬河長二萬九千六百七十五丈其河頭築壩仍照原估修建以新定漕規科算料物價值計挑河築壩今復估共用土方工料銀二萬五千五百九十兩一錢零至於舊鹽河閘金門內攔水壩工係動用堤園草束并令河兵挑土鑲壓不動錢糧所有原估銀兩相應一併節省以上照原估共該節省銀一萬二千七百一兩八錢零再查挑河工段之內有張家莊平旺河新安鎮一帶

水工照新定漕規例應每方加屏水銀一分五釐共銀八百三十八兩一錢零又查鹽河閘迤下王營草壩之北向有鮑家營引河頭築壩一座原備水勢長發宣洩之用因雍正八年黃運兩河並漲開放宣洩俾水暢由引河入海今鹽河旣估挑挖寬深應仍照舊築壩截攔黃水不致旁洩其遙堤所缺之處亦係河頭重門保障應補修與舊堤一律以資捍禦築壩補堤應用銀一千四百五十五兩

六錢零以上二共計用銀二千二百九十三兩八錢零應在於前項節省項下動用以上挑河岸水築壩補堤復估通共應用銀二萬七千八百八十三兩九錢零較之原估實節省銀一萬四百八兩零其節省錢糧應令解繳運庫毋庸衆商捐補又查鹽河下尾一段自平旺河堤尾迤下起至新安鎮止計程三十餘里兩岸向無堤堰夾束所以每當伏秋水大之年鹽河之水卽從此處散漫安東沐

陽海州一帶附近民田場窳多有被淹今相
度形勢令挑河人員卽將河內挑起之土離
河十丈築成子堰兩岸共築子堰一萬一千
二百餘丈不費錢糧而堤堰完備從此水無
散漫不特民田足資保護抑且鹽河賴以刷
深實爲一舉兩得裨益良多沿河居民歡聲
載道咸謂濱海之區皆成沃壤靡不焚香頂
祝感頌

皇恩今據該道將改估情形另造清冊詳請具

題前來臣等復查無異除一面飛咨鹽臣飭令

該商等購料募夫星速照依復估工程乘時

挑築臣一面多委幹練河員分工僨催如式

完竣并估冊送部查核外所有改估緣由相

應會同河東河臣朱藻署江南總督印務蘇

州巡撫協理河工事務臣尹繼善管理兩淮

鹽政布政使臣高斌合詞

題明伏乞

皇上睿鑒施行雍正十年閏五月初十日

題奉

旨該部議奏欽此部議准行雍正十年七月二十

七日奉

旨依議欽此

移建天妃石閘

題爲亟請移建閘座挑河築堤建壩以濟漕運
以衛民生事該臣等看得清河縣運口舊有
天妃石閘一座與越河石閘互相表裏以資
啟閉誠爲淮揚一帶漕運之咽喉最關緊要
祇緣天妃石閘自康熙四十九年間拆修至
今二十餘載兼之運口水勢湍激建甌而下
衝刷異常以致閘底椿石節被侵損金門雁
翅相繼傾圮據該道廳呈報到臣當卽親往

查看檄飭上緊煞壩償修又恐運口水勢全歸越河滙流湧急復飭另於越河鉗口壩上挑挖引河一道以資分洩去後今據署淮揚道印務夏建德詳稱遵於雍正九年冬回空漕船過畢之後即將天妃閘正河上下煞築攔河土埽壩工車水斷流以便拆卸修建又恐運口水勢全歸越河滙流湧急另於越河鉗口壩上挑挖引河一道以資分洩是以今歲重運糧船俱得由越河閘并新挑引河兩

路並進啣尾逆行惟是新挑引河雖資宣洩
而無閘座啟閉恐遇黃水驟長不無內灌之
虞亟應仍循舊制在於正河內建築石閘以
資啟閉查天妃舊閘基址虛鬆石墻倒卸實
難補葺必須通身折起另選堅實地基重新
修築方可垂久以資捍禦若仍在舊基修建
不惟朽壞椿木難以起盡卽閘基地勢愈空
愈深水勢愈低愈急船隻往來更難挽拽今
相度運口一帶地勢情形惟有二草壩迤下

北岸大堤之內地勢堅實堪以開塘建閘應
於此處上下挑通引水河道并兩岸修築束
水堤工將舊閘拆舊添新移建於此與越河
石閘互相表裏以資啟閉則漕運民生兩有
裨益查建閘挑河築堤建壩共估料物土方
夫工銀二萬九千九百八十八兩一錢零相
應造冊詳請核

題等情前來 臣等復核無異除照例先行動支
河庫銀兩給發辦料興修委淮揚道監工督

催并原冊送部查核外相應會同河東河臣
朱藻署江南總督印務蘇州巡撫協理河工
事務臣尹繼善恭疏具

題伏乞

皇上睿鑒勅部議覆施行雍正十年閏五月二十
二日

題奉

旨該部議奏欽此部議准行雍正十年八月初七
日奉

旨依議欽此